

摘藻堂四庫全書薈要

史部

欽定四庫全書蒼要卷六千一百三十三

遼史卷八

元中書右丞相總裁托克托等修

本紀第八

景宗一

景宗考成康靖皇帝諱賢字賢寧小字明辰世宗皇帝
第二子母曰懷節皇后蕭氏察克之亂帝甫四歲穆宗
即位養永興宮既長穆宗酖酒怠政帝一日與韓匡嗣

語及時事耶律賢適止之帝悟不復言應歷十九年二月戊辰入見穆宗曰吾兒已成人可付以政己巳穆宗遇弒帝率飛龍使紐哩侍中蕭思溫南院樞密使高勳率甲騎千人馳赴黎明至行在哭之慟羣臣勸進遂即皇帝位於樞前百官上尊號曰天贊皇帝大赦改元保寧以殿前都點檢伊勒哈右皮室詳袞蕭烏瑀濟宿衛不嚴斬之三月丙戌入上京以蕭思溫為北院樞密使太平王雅斯哈亡入沙陀己丑伊勒希巴諾木歡以陰

附雅斯哈伏誅癸巳雅斯哈入朝甲午以北院樞密使
蕭思溫兼北府宰相己亥南院樞密使高勳封秦王夏
四月戊申朔進封太平王雅斯哈為齊王改封趙王喜
隱為宋王封隆先為平王舒為吳王道隱為蜀王必舒
為越王迪里為冀王完為衛王五月戊寅立貴妃蕭氏
為皇后丙申朔射柳祈雨有司請以帝生日為天清節
從之壬寅漢遣李匡弼劉繼文李元素來賀冬十月東
幸裏潭十一月甲辰朔行柴冊禮祠木葉山駐蹕鶴谷

乙巳蕭思溫封魏王北院大王烏哲加裕悅

二年春正月丁未如潢河夏四月幸東京致奠于讓國
皇帝及世宗廟五月癸丑西幸乙卯次盤道嶺盜殺北
院樞密使蕭思溫六月還上京秋七月以右皮室詳袞
賢適為北院樞密使九月辛丑得國舅蕭哈濟及哈里
殺蕭思溫狀皆伏誅流其弟紳圖于黃龍府十二月庚
午漢遣使來貢

三年春正月甲寅右伊勒希巴希達遣人獻德呼勒俘

詔賜有功將士庚申置登聞鼓院辛酉南京統軍使韓
匡美封鄴王二月癸酉東幸壬午遣多和使阿爾斯蘭
回鶻己丑以青牛白馬祭天地三月丁未以飛龍使紐
哩為契丹行宮都部署夏四月丁卯世宗妃卓琳及普
格厭魅賜死己卯祠木葉山行再生禮丙戌至自東幸
戊子蕭紳圖伏誅六月丙子漢遣使問起居自是繼月
而至丁丑回鶻遣使來貢秋七月辛丑以北院樞密使
賢適為西北路招討使八月甲戌如秋山辛卯祭皇兄

吼墓追冊為皇太子謚莊聖九月乙巳賜傅父侍中達

里塔太保楚補太保丕勒保母霍實頁頁等戶口牛羊

有差又以潛邸給使者為撻馬部置官主之壬子幸歸

化州甲寅如南京冬十月己巳以黑白羊祀神癸未漢

遣使來貢丙戌布古德吐谷渾來貢十一月庚子臚胸

河裕悅揚尼哩等率戶四百五十來附乞隸宮籍詔留

其戶分隸敦睦積慶永興三宮優賜遺之十二月癸酉

以青牛白馬祭天地己丑皇子隆緒生是冬駐蹕金川

四年春二月癸亥漢以皇子生遣使來賀閏月戊申齊
王雅斯哈薨三月庚申朔追冊為皇太叔夏四月庚寅
朔追封蕭思溫為楚國王是夏駐驛冰井秋七月如雲
州丁丑布古德來貢冬十月丁亥朔如南京十二月甲
午詔內外官上封事

五年春正月甲子特哩袞休格伐党項破之以俘獲數
來上漢遣使來貢庚午御五鳳樓觀燈二月丁亥近侍
薩喇勒誤觸神燾法論死杖釋之壬辰越王必舒獻黨

項俘獲之數戊申以青牛白馬祭天地辛亥幸新城三
月乙卯朔復幸新城追封皇后祖瑚穆哩為韓王贈伯
瑚嚕古兼政事令寧古齊兼侍中夏四月丙申白氣晝
見五月癸亥裕悅烏哲薨輟朝三日辛未女直侵邊殺
都監達里塔伊喇鄂囉羅掠邊民牛馬己卯阿爾斯蘭
回鶻來貢六月庚寅女直宰相額爾奇木來朝丙申漢
遣人以宋事來告秋七月庚辰以保大軍節度使耶律
薩勒題為中臺省左相是月駐蹕燕子城九月壬子布

古德部長阿嚕達蘭來貢冬十月丁酉如南京十一月
辛亥朔始獲應歷逆黨近侍霄格華格錫袞等誅之十
二月戊戌漢將改元遣使稟命是月如歸化州

六年春正月癸未幸南京三月宋遣使請和以涿州刺
史耶律昌珠加侍中與宋議和夏四月宋王喜隱坐謀
反廢秋七月丁未朔閣門使卓庫加檢校太尉兼御史
大夫男哈里以告喜隱事遙授隴州防禦使庚申獵于
平地松林冬十月乙亥朔還上京十二月戊子以沙門

昭敏為三京諸道僧尼總都管加兼侍中

七年春正月甲戌朔宋遣使來賀壬寅望祠木葉山二
月癸亥漢鴈門節度使劉繼文來朝貢方物丙寅以青
牛白馬祭天地三月壬午耶律蘇色等獻堯項俘分賜
羣臣夏四月遣郎君舒蘇使宋己酉祠木葉山辛亥射
柳祈雨如頻蹕浣清暑五月丙戌祭神姑秋七月黃龍
府衛將燕頗殺都監張琚以叛遣敵史耶律噶勒畢討
之九月敗燕頗於治河遣其弟安圖追之燕頗走保烏

舍城安圖乃還以餘黨千餘戶城通州是秋至自頻蹕
淀冬十月釣魚土河

八年春正月癸酉宋遣使來聘二月壬寅諭史館學士
書皇后言亦稱朕暨予著為定式三月辛未遣五使廉
問四方鰥寡孤獨及貧乏失職者賑之夏六月以西南
面招討使耶律色珍為北院大王秋七月丙寅朔寧王
扎穆婁安扎伏誅扎穆高勳等除名辛未宋遣使來賀
天清節八月癸卯漢遣使言天清節設無遮會飯僧祝

釐丁未如秋山己酉漢以宋事來告是月女直侵貴德
州東境九月己巳謁懷陵辛未東京統軍使察剌詳袞
古奏女直襲歸州五寨剽掠而去乙亥布古德來貢壬
午漢為宋人所侵遣使求援命南府宰相耶律沙翼王
迪里赴之戊子漢以宋師壓境遣駙馬都尉盧俊來告
冬十月辛丑漢以遼師退宋軍來謝十一月丙子宋主
匡胤殂其弟昞自立遣使來告辛卯遣郎君旺祿塔瑪
訥默庫等使宋弔慰十二月壬寅遣蕭哲庫馬哲賀宋

即位丁未漢以宋軍復至掠其軍儲來告且乞賜糧為
助戊午詔南京復禮部貢院是月哈噶斯國遣使來貢

遼史卷八

遼史卷八考證

景宗小字明辰 按契丹志作明計以音近而譌也

保寧元年斬殿前都點檢耶律伊勒哈 按伊勒哈原

文夷臘葛此又訛夷臘即係一人今併改

保寧六年三月宋遣使請和遣耶律昌珠與宋議和

按職官分紀開寶七年契丹涿州刺史耶律琮以書

遺雄州孫全興願講好于朝廷八年契丹遣克實克

舒蘇來聘自是乃通使矣與紀異又遼書昌珠而宋

欽定四庫全書

卷八考證

書琮其名亦互異

遼史卷八考證

欽定四庫全書薈要卷六千一百三十四

遼史卷九

元中書右丞相總裁托克托等修

本紀第九

景宗二

九年春正月丙寅女直遣使來貢二月庚子宋遣使致
其先帝遺物甲寅以青牛白馬祭天地三月癸亥耶律
沙迪里獻援漢之役所獲宋俘戊辰詔以粟二十萬斛

助漢五月庚午漢遣使來謝且以宋事來告己丑女直

二十一人請宰相額爾奇木之職以次授之六月丙辰

以宋王喜隱為西南面招討使秋七月庚申朔回鶻遣

使來貢甲子宋遣使來聘壬申漢以宋侵來告丙子遣

使助漢戰馬八月漢遣使進葡萄酒冬十月甲子耶律

沙以黨項降酋克酬摩約來見賜詔撫諭丁卯以克酬

為司徒摩約為太保各賜物遣之壬申女直遣使來貢

乙酉漢復遣使以宋事來告十一月丁亥朔司天奏日

當食不虧戊戌吐谷渾叛入太原者四百餘戶索而還
之癸卯祠木葉山乙巳遣太保塔剌嗜等使宋乙卯漢
復遣使以宋事來告十二月戊辰獵于近郊以所獲祭
天

十年春正月癸丑如長樂二月庚午阿爾斯蘭回鶻來
貢三月庚寅祭顯陵夏四月丁卯西幸己巳女直部來
貢五月癸卯賜紐哩死遣人誅高勳等六月己未駐蹕
泂柳湖秋七月庚戌享太祖廟九月癸未平王隆先子

辰格謀害其父車裂以徇是冬駐蹕金川

乾亨元年春正月乙酉遣塔瑪長壽使宋問興師伐劉繼元之故丙申長壽還言河東逆命所當問罪若北朝不援和約如舊不然則戰二月丁卯漢以宋兵壓境遣使乞援詔南府宰相耶律沙為都統冀王迪里為監軍赴之又命南院大王色珍以所部從樞密副使穆濟督之三月辛巳蘇色遣人以別部革格等降納之丙戌漢遣使謝撫諭軍民詔北院大王希達伊實王薩哈勒以

兵戍燕已丑漢復告宋兵入境詔左千牛衛大將軍韓
侖大同軍節度使耶律善補以本路兵南援辛卯女直
遣使來貢丁酉耶律沙等與宋戰於白馬嶺不利冀王
迪里及圖魯卜部節度使圖敏黃皮室詳袞唐古皆死
之士卒死傷甚衆夏四月辛亥漢以行軍事宜來奏盧
俊自代州告急辛酉德哱勒部來貢五月己卯宋兵至
河東漢與戰不利劉繼文盧俊來奔六月劉繼元降宋
漢亡甲子封劉繼文為彭城郡王盧俊同政事門下平

章事宋主來侵丁卯北院大王希達統軍使蕭托果伊
實王薩哈勒迎戰于沙河失利己巳宋主圍南京丁丑
詔諭耶律沙及希達托果等軍中事宜秋七月癸未沙
等及宋兵戰于高梁河少却休格色珍橫擊大敗之宋
主僅以身免至涿州竊乘驢車遁去甲申擊宋餘軍所
殺甚衆獲兵仗器甲符印糧饋貨幣不可勝計辛丑耶
律沙遣人上俘獲以權知南京留守事韓德讓權南京
馬步軍都指揮使耶律學古知三司事劉宏皆能安人

心捍城池賜詔褒獎八月壬子準布特哩袞赫魯額爾
奇木阿爾圖來朝乙丑耶律沙等獻俘丙寅以白馬之
役責沙穆濟復以走宋立功釋之希達遇敵而退以劔
背擊之薩哈勒雖却部伍不亂宥之冀王迪里麾下先
遁者斬之杖都監以下壬申宴沙穆濟等將校賜物有
差九月己卯燕王韓匡嗣為都統南府宰相耶律沙為
監軍特哩袞休格南院大王色珍權奚王穆濟各率所
部兵南伐仍命大同軍節度使善補領山西兵分道以

進冬十月乙丑韓匡嗣與宋兵戰於滿城敗績辛未太保舒蘇與宋兵戰於火山敗之乙亥詔數韓匡嗣五罪赦之十一月戊寅宴賞休格及有功將校乙未南院樞密使兼政事令郭襲上書諫畋獵嘉納之辛丑冬至赦改元乾亨十二月乙卯燕王韓匡嗣遙授晉昌軍節度使降封秦王壬戌蜀王道隱為南京留守徙王荆是冬駐蹕南京

二年春正月丙子朔封皇子隆緒為梁王隆慶為恒王

丁亥特哩袞休格為北院大王前樞密使賢適封西平
郡王二月戊辰如清河三月丁亥西南面招討副使耶
律旺祿太尉華格遣人獻黨項俘閏月庚午有鵝飛止
御帳獲以祭天夏四月庚辰祈雨戊子清暑燕子城五
月雷火乾陵松六月己亥喜隱復謀反囚于祖州秋七
月戊午旺祿等獻黨項俘八月戊戌東幸冬十月辛未
朔命巫者祠天地及兵神辛巳將南伐祭旗鼓癸未次
南京丁亥獲敵人射鬼箭庚寅次固安以青牛白馬祭

天地已亥圍瓦橋關十一月庚子朔宋兵夜襲營圖魯
卜部節度使蕭幹及四捷軍詳袞耶律赫德戰却之壬
寅休格敗宋兵於瓦橋東守將張師引兵出戰休格奮
擊敗之戊申宋兵陣於水南休格涉冰擊破之追至莫
州殺傷甚衆己酉宋兵復來擊之殆盡丙辰班師乙丑
還次南京十二月庚午朔休格拜裕悅大饗軍士

三年春二月丙子東幸己丑復幸南京三月乙卯皇子
罕巴卒辛酉葬潢土二河之間置永州以秦王韓匡嗣

為西南面招討使五月丙午上京漢軍亂劫立喜隱不
克偽立其子留禮壽上京留守楚實勒擒之秋七月甲子
誅留禮壽冬十月如富瑚坡十一月辛亥加楚實勒同
政事門下平章事是月以南院樞密使郭襲為武定軍
節度使十二月以遼興軍節度使韓德讓為南院樞密
使

四年春正月己亥如華林天柱三月乙未清明與諸王
大臣較射宴飲夏四月自將南伐至滿城戰不利守太

尉奚幹里中流矢死統軍使善補為伏兵所圍樞密使
色珍救免詔以失備杖之五月班師清暑燕子城秋七
月壬辰遣使賜喜隱死八月如西京九月庚子幸雲州
甲辰獵于尚和山帝不豫壬子次焦山崩於行在年三
十五在位十四年遺詔梁王隆緒嗣位軍國大事聽皇
后命統和元年正月壬戌上尊諡孝成康靖皇帝
重熙二十一年加諡孝成康靖皇帝

贊曰遼興六十餘年神冊會同之間日不暇給天祿應

歷之君不令其終保寧而來人人望治以景宗之資任人不疑信賞必罰若可與有為也而竭國之力以助河東破軍殺將無救滅亡雖一取償於宋得不償失知匡嗣之罪數而不罰善郭襲之諫納而不用沙門昭敏以左道亂德寵以待中不亦惑乎

遼史卷九

遼史卷九考證

保寧九年七月宋遣使來聘 按續通鑑綱目契丹遣

耶律敞如宋會葬宋遣辛仲甫報之考契丹國志敞
官鴻臚少卿遼史不書會葬之使又續資治通鑑長
編宋使起居舍人辛仲甫如契丹右贊善大夫穆波
副之又契丹志帝欲留仲甫仲甫不可厚禮遣還此
失載宋史姓名

乾亨元年十月韓匡嗣與宋兵戰于滿城敗績 按契

丹志秋九月攻鎮州為宋趙延進所敗考之李燾長
編此即滿城之戰亦作九月俱與此異

景宗在位十四年 按原本訛十三年今改

遼史卷九考證

欽定四庫全書蒼要卷六千一百三十五

遼史卷十

元中書右丞相總裁托克托等修

本紀第十

聖宗一

聖宗文武大孝宣皇帝諱隆緒小字文殊努景宗皇帝
長子母曰睿智皇后蕭氏帝幼喜書翰十歲能詩既長
精射法曉音律好繪畫乾亨二年封梁王四年九月壬

子景宗崩癸丑即皇帝位於柩前時年十二皇后奉遺
詔攝政詔諭諸道冬十月己未朔帝始臨朝辛酉羣臣
上尊號曰昭聖皇帝尊皇后為皇太后大赦以南院大
王巴固濟總領山西諸州事北院大王裕悅休格為南
面行軍都統奚王和碩鼐副之同政事門下平章事蕭
道寧領本部軍駐南京乙丑如顯州十一月甲午置乾
州十二月戊午即律蘇色討準布辛酉南京留守荆王
道隱奏宋遣使獻犀帶請和詔以無書却之甲子達爾

罕納旺舒醉言宮掖事法當死杖而釋之辛未南面招
討使秦王韓匡嗣薨癸酉奉大行皇帝梓宮于叢塗殿
庚辰省置中臺省官

統和元年春正月戊午朔以大行在殯不受朝乙丑奉
遺詔召先帝庶兄扎穆于叢塗殿前復封寧王加宰相
室昉宣徽使布琳等恩丙寅荆王道隱有疾詔遣使存
問是日皇太后幸其邸視疾戊辰以威烏庫哩部節度
使耶律章烏克同政事門下平章事甲戌荆王道隱薨

輟朝三日追封晉王遣使撫慰其家丙子以裕悅休格為南京留守仍賜南面行營總管印綬總事渤海塔瑪嘉哩以受先帝厚恩乞殉葬詔不許賜物以旌之戊寅遣使賜裕悅休格及奚王籌寧統軍使佛德等湯藥命根敦持送休格下車榜以諭燕民辛巳蘇色獻準布俘壬午涿州刺史安吉奏宋築城河北詔留守裕悅休格撓之勿令就功趙妃及公主和克丹奚王籌寧宰相安寧北大王普努寧特哩衮庫哩吳王舒寧王扎穆橫

帳國舅契丹漢官等並進助山陵費癸未齊國公主率
內外命婦進物如之甲申西南面招討使韓德威奏黨
項十五部侵邊以兵擊破之乙酉以蘇色破準布下詔
褒美仍諭與達罕討黨項諸部丁亥樞密使兼政事令
室昉以年老請解兼職詔不允二月戊子朔禁所在官
吏軍民不得無故聚衆私語及冒禁夜行違者坐之已
丑南京奏聞宋多聚糧邊境及宋主將如臺山詔休格
嚴為之備甲午葬景宗皇帝於乾陵以近幸朗掌飲伶

人塔魯為殉上與皇太后因為書附上大行丙申皇太后詣陵置奠命繪近臣於御容殿賜山陵工人物有差庚子以先帝遺物賜皇族及近臣辛丑南京統軍使耶律善補奏宋邊七十餘村來附詔撫存之乙巳以御容殿為玉殿酒谷為聖谷蘇色奏討黨項捷遣使慰勞戊申特哩袞華格為北院大王吉琳為南府宰相辛亥辛聖山遂謁三陵甲寅以皇女長壽公主下嫁國舅宰相蕭布希之子烏里三月戊午天德軍節度使推勃父子

戰歿以其弟聶呼襲爵己未次獨山遣使賞西南面有
功將士辛酉以大父帳太尉耶律赫勒訥為特哩袞甲子
駐蹕遼河之平淀辛巳以國舅同平章事蕭道寧為遼
興軍節度使仍賜號忠亮佐理功臣壬午以青牛白馬
祭天地夏四月丙戌朔幸東京以樞密副使耶律穆濟
兼侍中為東京留守庚寅謁太祖廟癸巳詔賜物命婦
寡居者丙申南幸辛丑謁三陵以東京所進物分賜陵
寢官吏復詔賜西南路招討使達罕劔不用命者得專

殺壬寅致享于凝神殿癸卯謁乾陵乙巳遣人以酒脯
祭平章耶律哈雅墓庚戌幸夫人烏庫哩第謁太祖御
容禮畢幸公主和克丹第飲賜與甚厚壬子大臣以太
后預政宜有尊號請下有司詳定冊禮詔樞密院諭沿
邊節將至行禮日止遣子弟奉表稱賀恐失邊備樞密
請詔北府司徒佛德譯南京所進律文從之遂如徽州
以耶律慶詡為信州節度使五月丙辰朔國舅政事門
下平章事蕭道寧以皇太后慶壽請歸父母家行禮而

齊國公主及命婦羣臣各進物設宴賜國舅帳者年物
有差壬戌西南路招討請益兵討西突厥諸部詔北王
府耶律普努寧以達巴德呼勒部兵赴之癸亥以裕悅
休格在南院過用吏人詔南大王母相循襲庚午耶律
善補招亡入宋者得千餘戶歸國詔命撫慰辛未次永
州祭王子藥師努墓乙亥詔近臣議皇太后上尊號冊
禮樞密使韓德度以後漢太后臨朝故事草定上之丙
子以青牛白馬祭天地戊寅幸木葉山西南路招討使

達罕奏近遣伊喇伯勒格諭黨項諸部來者甚衆下詔
褒美六月乙酉朔詔有司冊皇太后曰給三品以上法
服三品以下用大射柳之服西南路招討使奏黨項酋
長執額爾奇木子烏延等內附詔撫納之仍察其誠偽
謹邊備丙戌還上京己丑有司奏同政事門下平章事
駙馬都尉盧俊與公主不協詔離之遂出俊為興國軍
節度使辛卯有事于太廟甲午上率羣臣上皇太后尊
號曰承天皇帝太后羣臣上皇帝尊號曰天輔皇帝大赦

改元統和丁未覃恩中外文武官各進爵一級以樞密
副使耶律色珍守司徒秋七月甲寅朔皇太后聽政乙
卯上親錄囚王子司徒羅和坐稱疾不赴山陵答二十
辛酉行再生禮癸酉臨潢尹諾袞進飲饌上與諸王分
朋擊鞠丙子韓德威遣詳袞哈爾瑪上破黨項俘獲以
額爾奇木之子來獻辛巳賞西南面有功將士八月戊
子上西巡己丑謁祖陵辛卯皇太后祭楚國王蕭思溫
墓癸巳上與皇太后謁懷陵遂幸懷州甲午上與色珍

於太后前易弓矢鞍馬約以為友己亥獵赤山遣使薦
熊肪鹿脯于乾陵之凝神殿以政事令孫楨無子詔國
舅小翁帳郎君圖卜威為後乙巳詔裕悅休格提點元
城壬子韓德威表請伐黨項之復叛者詔許之仍發別
部兵數千以助之九月癸丑朔以東京平州旱蝗詔賑
之乙卯謁永興長寧敦睦三宮丙辰南京留守奏秋霖
害稼請權停關征以通山西糴易從之庚申謁宣簡皇
帝廟辛酉幸祖州謁祖陵壬戌還上京辛未有司請以

帝生日為千齡節從之皇太后言故裕悅烏哲有傳導

功宜錄其子孫遂命其子巴延為林牙丙子如老翁川

冬十月癸未朔司天奏老人星見戊子以公主淑格下

嫁國舅詳袞珠克癸巳蘇色奏德呼勒部及叛蕃降悉

復故地乙未以燕京留守裕悅休格言每歲諸節度使

貢獻如契丹宮例止進鞍馬從之丁酉以吳王舒為上

京留守行臨潢尹事上將征高麗親閱東京留守耶律

穆濟所總兵馬丙午命宣徽使兼侍中布琳林牙克特

等將兵東討賜旗鼓及銀符十一月壬子朔觀漁塔瑪

灤癸丑應州奏獲宋諜者言宋除道五臺山將入靈丘

界詔諜者及居停人並磔于市庚辰上與皇太后祭乾

陵下詔諭三京左右相左右平章事副留守判官諸道

節度使判官諸軍事判官錄事參軍等當執公方母得

阿順諸縣令佐如遇州官及朝使非理徵求毋或畏徇

恒加采聽以為殿最民間有父母在別籍異居者聽鄰

里覺察坐之有孝于父母三世同居者旌其門閭十二

月壬午朔謁凝神殿遣使分祭諸陵賜守殿官屬酒是
日幸顯州丁亥以顯州歲貢綾錦分賜左右甲午東幸
己亥皇太后觀漁于玉盆灣辛丑觀漁于濬淵甲辰勅
諸刑辟已結正決遣而有寃者聽詣臺訴是夕然萬魚
燈于雙溪戊申千齡節祭日月禮畢百僚稱賀

二年春正月甲子如長樂二月癸巳國舅帳彰德軍節
度使蕭達林來朝甲午賜將軍耶律德布春衣束帶丙
申東路行軍宣徽使蕭布琳奏討女直捷遣使執手獎

諭庚子朝皇太后太后因從觀獵于饒樂州乙巳五國

威于厥節度使耶律威烏克以所轄諸部難治乞賜詔

給劔便宜行事從之丙午上與諸王大臣較射丁未韓

德威以征黨項迴遂襲河東獻所得賜詔褒美三月乙

卯華喇部請今後詳袞止從本部選授為宜上曰諸部

官惟在得人豈得定以所部為限不允贈故同平章事

趙延煦兼侍中夏四月丁亥以宣徽使同平章事蕭布

琳都監蕭勤德獻征女直捷授布琳兼政事令勤德神

武衛大將軍各賜金器諸物庚寅皇太后臨決滯獄辛卯祭風伯壬辰以宣徽南院使劉承規為承德軍節度使崇德宮都部署保義軍節度使張德筠為宣徽北院使五月乙卯祠木葉山丁丑駐蹕浴柳湖六月己卯朔皇太后決獄至月終秋七月癸丑皇太后行再生禮八月辛卯東京留守兼侍中耶律穆濟奏女直珠卜奇薩里等八族乞舉衆內附詔納之九月戊申朔駐蹕土河辛未以景宗忌日詔諸道京鎮遣官行香飯僧冬十月

丁丑朔以歸化州刺史耶律普寧為彰德軍節度使右
武衛大將軍韓信為彰國軍節度使兼侍衛親軍兵馬
都指揮使十一月壬子以樞密直學士兼給事中鄭嘏
為儒州刺史是月蘇色等討準布殺其酋長達爾罕十
二月辛丑以翰林學士承旨馬得臣為宣政殿學士耶
律佛德南京統軍使耶律瑤昇大內特哩袞大仁靖東
京中臺省右平章事

三年春正月丙午朔如長瀛丁巳以翰林學士邢抱朴

為尚書禮部侍郎知制誥左拾遺知制誥劉景吏部郎
中知制誥牛藏用並政事舍人二月丙子朔以牛藏用
知樞密直學士三月乙巳朔樞密奏契丹諸役戶多困
乏請以富戶代之上因閱諸部籍以納喇威二部戶少
而役重并量免之夏四月乙亥朔祠木葉山壬午以鳳
州刺史趙匡符為保靜軍節度使癸未以左監門衛大
將軍王庭勗為奉先軍節度使彰武軍節度使韓德凝
為崇義軍節度使五月壬子還上京癸酉以國舅蕭道

寧同平章事知潘州軍州事六月甲戌如栢坡皇太后

親決滯獄乙亥以歸義軍節度使王希嚴為興國軍節

度使秋七月甲辰朔詔諸道繕甲兵以備東征高麗甲

寅東幸甲子遣郎君巴寧賜秦王韓匡嗣葬物丙寅駐

蹕土河以暴漲命造船橋明日乘步輦出聽政老人星

見丁卯遣使閱東京諸軍兵器及東征道路以平章事

蕭道寧為昭德軍節度使武定軍節度使守司空兼政

事令郭襲為天平軍節度使大同軍節度使守太子太

師兼政事令劉延構為義成軍節度使贈尚父秦王韓
匡嗣尚書令八月癸酉朔以遼澤沮洳罷征高麗命樞
密使耶律色珍為都統駙馬都尉蕭恒德為監軍以兵
討女直丁丑次橐城庚辰至顯州謁凝神殿辛巳幸乾
州觀新宮癸未謁乾陵甲申命南北面臣僚分巡山陵
林木及命乾顯二州上所部里社之數丙戌北皮室詳
袞進勇敢士七人戊子故南院大王錫林伊囉斡妻蕭
氏奏夫死不能葬詔有司助之庚寅東征都統所奏路

尚陷寧未可進討詔俟澤涸深入癸巳皇太后謁顯陵

庚子謁乾陵辛丑酉幸閏九月癸酉命邢抱朴勾檢顯

陵丙子行次海上庚辰重九駱駝山登高賜羣臣菊花

酒辛巳詔諭東征將帥乘水涸進討丙申女直宰相哲

伯埒來貢戊戌駐蹕東古山己亥蘇色奏珠巴克諸部

至近浞額爾奇木伊楞古請俘掠上曰諸部於國無惡

何故俘掠徒生事耳不允冬十一月甲戌詔吳王舒領

秦王韓匡嗣葬祭事丁丑詔以東北路兵馬監軍妻布

達拉存撫邊民戊寅賜公主和克丹葬夫金帛工匠辛
卯以韓德讓兼政事今癸巳禁行在市易布帛不中尺
度者丙申東征女直都統蕭達林菩薩努以行軍所經
地里物產來上

遼史卷十

遼史卷十考證

聖宗即位之十二月戊午 按歷象志朔考是年十二月戊午係朔日

統和元年二月以特哩袞華格為北院大王 按華格傳華格以平宗功遷北院大王事在統和四年

統和元年四月幸公主和克丹第 按和克丹原文胡骨典公主表作和骨典此處又訛胡克典今併改

統和元年六月大赦改元統和 按續通鑑改元統和

復國號大契丹紀不書復國號事

統和二年二月彰德軍節度使蕭達林來朝 按達林

原文捷凜又作闡覽本紀統和七年以前俱作闡覽
十二年以後俱作捷凜實係一人考本傳作捷凜今
畫一改

統和二年四月宣徽使同平章事蕭布琳獻女直捷

按布琳姓蕭氏原文作普領又作蒲寧又作普寧至
此處并訛其姓為耶律遂與北院大王耶律普努寧

原文普奴寧又作蒲奴寧者相混二人史皆無傳均見于聖宗本紀布琳自統和元年正月初見為宣徽使至七年四月率兵備宋凡十見其官始終以宣徽使稱普努寧自統和元年正月至四年十二月本紀凡八見其官始終以北院大王稱今並分別改正惟二年十月以歸化州刺史耶律普寧為彰德軍節度使又別是一人今仍原文

統和二年六月己卯朔 按宋史是年六月庚辰朔

統和二年十一月壬子 按原本壬子上衍冬字上文

已於十月標明今刪

統和二年十二月即律瑤昇大內特哩袞 按瑤昇即

即律善補之字見本傳

統和三年八月駙馬都尉蕭恒德為監軍 按蕭恒德

統和元年尚越國公主原本訛恒德為懇德今改

統和三年閏九月駐蹕東古山 按遊幸表作東右山

遼史卷十考證

欽定四庫全書蒼要卷六千一百三十六

遼史卷十一

元中書右丞相總裁托克托等修

本紀第十一

聖宗二

四年春正月甲戌觀漁土河林牙耶律穆爾古彰德軍節度使蕭達林上東征俘獲賜詔獎諭丙子樞密使耶律色珍林牙勤德等上討女直所獲生口十餘萬馬二

十餘萬及諸物已卯朝皇太后決滯訟壬午樞密使色
珍林牙勤德穆爾古節度使達林統領使碩羅侍中穆
濟奚王府監軍迪里與安吉等克女直還軍遣近侍尼
勒堅詔旌其功仍執手撫諭賜酒果勞之甲午辛長滌
二月壬寅以四蕃都統軍李繼忠為檢校司徒上柱國
癸卯西夏李繼遷叛宋來降以為定難軍節度使銀夏
綏宥等州觀察處置等使特進檢校太師都督夏州諸
軍事西蕃酋帥斡尼奇保為保大軍節度使廊坊等州

觀察處置等使甲寅耶律色珍蕭達林穆爾古等族帥
來朝行飲至禮賞賚有差丙寅行次紐斡哩并三月甲
戌裕悅休格奏宋遣曹彬崔彥進米信由雄州道田重
進飛狐道潘美楊繼業鴈門道來侵岐溝涿州固安新
城皆陷詔宣徽使布琳馳赴燕南與休格議軍事分遣
使者徵諸部兵益休格以擊之復遣東京留守耶律穆
濟以大軍繼進賜劔專殺乙亥以親征告陵廟山川丙
子統軍使耶律佛德敗宋軍于固安休格絕其糧餉擒

將吏獲馬牛器仗甚衆庚辰寰州刺史趙彥章以城叛
附于宋辛巳宋兵入涿州義順軍節度副使趙希贊以
朔州叛附于宋時上與皇太后駐兵馳羅口詔趣東征
兵馬以為外援壬午詔林牙勤德以兵守平州之海岸
以備宋仍報平州節度使特哩袞若勤德未至遣人趣
行馬乏則括民馬鎧甲闕則取於顯州之甲坊癸未遼
軍與宋田重進戰于飛狐不利冀州防禦使大鵬翼康
州刺史馬贊馬軍指揮使何萬通陷馬丁亥以北院樞

密使耶律色珍為山西兵馬都統以北院宣徽使布琳
為南征都統以副裕悅休格彰國軍節度使艾正觀察
判官宋雄以應州叛附于宋庚寅遣飛龍使雅嚕文班
吏雅圖鳴聞馬以給先發諸軍招駙馬都尉蕭繼遠領
之辛卯武定軍馬步軍都指揮使郢州防禦使呂行德
副都指揮使張繼從馬軍都指揮使劉之進等以飛狐
叛附于宋癸巳賜林牙穆爾古旗鼓四劍一率禁軍之
驍銳者南助休格丙申步軍都指揮使穆超以靈丘叛

附于宋詔遣使賜樞密使色珍密旨及彰國軍節度使
雙寬印以趣征討夏四月己亥朔次南京北郊庚子特哩
袞瑤昇西南面招討使韓德威以捷報辛丑宋潘美陷
雲州壬寅遣穆濟穆爾古勤德等領偏師以助休格仍
賜旗鼓雙寬印撫諭將校癸卯休格復以捷報上以酒
脯祭天地率羣臣賀于皇太后詔勤德還軍丙午佛德
上所獲鎧仗數戊申監軍宣徽使布琳奏敵軍引退而
奚王籌寧北大王普努寧統軍使佛德等以兵追躡皆

勝之遣故史勤德持詔褒美及詔侍中穆濟統諸軍赴
行在所本布部節度使和勒敦黃皮室詳袞嘉哩等各
上所獲兵甲又詔兩部突騎赴蔚州以助達林橫帳郎
君老君努率諸郎君巡徼居庸之北將軍華格統平州
兵馬橫帳郎君努克為黃皮室都監郎君伊里為北府
都監各以步兵赴蔚州以助色珍庚戌以色珍為諸路
兵馬都統達林兵馬副部署托色都監以代善補韓德
威癸丑以艾正趙希贊及應州朔州節度副使奚軍小

校阿爾嘉渤海小校果哈等叛入于宋籍其家屬分賜
有功將校宋將曹彬朱信北渡拒馬河與裕悅休格對
壘挑戰南北列營長六七里時上次涿州東五十里甲
寅詔裕悅休格奚王籌寧宣徽使布琳南北二王等嚴
備水道無使敵兵得潛至涿州乙卯休格等敗宋軍獻
所獲器甲貨財賜詔褒美蔚州左右都押衙等存璋許
彥欽等殺節度使蕭作琳執監城使銅州節度使耿紹
忠以城叛附于宋丙辰復涿州告天地戊午上次沙活

河之北淀台林牙勤德議軍事諸將校各以所獲俘來
上奚王籌寧南北二王率所部將校來朝以近侍納穆
爾所進自落鵠祭天地己未休格布琳來朝詔三司給
軍前夏衣布庚申上朝皇太后辛酉大軍次固安壬戌
圍固安城統軍使佛德先登城遂破大縱俘獲居民先
被俘者命以官物贖之甲子賞攻城將士有差五月庚
午遼師與曹彬米信戰于岐溝關大敗之追至拒馬河
溺死者不可勝紀餘衆奔高陽又為遼師衝擊死者數

萬棄戈甲若丘陵輓漕數萬人匿岐溝空城中圍之壬申以皇太后生辰縱還癸酉班師還次新城休格布琳奏宋兵奔逃者皆殺之甲戌以軍捷遣使分諭諸路京鎮丁丑詔諸將校論功行賞無有不實己卯次固安南以青牛白馬祭天地庚辰以所俘宋人射鬼箭詔遣詳袞巴雅爾率弘義官兵及南北皮室郎君伊喇四軍赴應朔二州界與特哩袞瑤昇招討韓德威同禦宋兵在山西之未退者早已以瑤昇軍赴山西壬午還次南京癸

未休格籌寧普努寧進俘獲色珍遣判官博諾奏復蔚
州斬首二萬餘級乘勝攻下靈丘飛狐賜博諾酒及銀
器丙戌御元和殿大宴從軍將校封休格為宋國王加
布琳籌寧普努寧及諸有功將校爵賞有差丁亥發南
京詔休格備器甲儲粟待秋大舉南征戊子色珍奏宋
軍復圍蔚州擊破之詔以兵授瑤昇韓德威等壬辰以
宋兵至平州瑤昇韓德威不盡追殺降詔詰責仍諭據
城未降者必盡掩殺無使遁逃癸巳以軍前降卒分賜

扈從乙未賞佛德諸將校士卒六月戊戌朔詔韓德威
赴闕加統軍使佛德檢校太師甲辰詔南京留守休格
遣礮手西助色珍乙巳伊勒希巴珠勒呼部送輜重行
宮暑行日五十里人馬疲乏遣使讓之丁未度居庸關
壬子南京留守奏百姓歲輸三司鹽鐵錢折絹不如直
詔增之甲寅色珍奏復寰州乙卯皇太妃諸王公主迎
上嶺表設御幄道傍置景宗御容率從臣進酒陳俘獲
于前遂大宴戊午幸涼陁以所得作分賜族及乳母已

未聞所遣宣諭回鶻克呼克國都掄雅里等為珠巴克
邀留詔蘇色賜珠巴克貨弊諭以朝廷來遠之意使者
由是乃得行癸亥以節度使韓布格翰林學士邢抱朴等
充雲州宣諭招撫使丙寅以太尉旺布所俘生口分
賜趙妃及裕悅約尼伊囉幹秋七月丙子樞密使色珍
遣侍御訥呼岱噶楚噶奏復朔州擒宋將楊繼業及上
所獲將校印綬誥勅賜訥呼岱等酒及銀器辛巳以捷
告天地以宋歸命者二百四十人分賜從人又以殺敵

多詔上京開龍寺建佛事一月飯僧萬人辛卯色珍奏
大軍至蔚州營于州左得牒報敵兵且至乃設伏以待
敵至縱兵逆擊追奔逐北至飛狐口遂乘勝鼓行而西
入寰州殺守城吏卒千餘人宋將楊繼業初以驍勇自
負號揚無敵北據雲朔數州至是引兵南出朔州三十
里至狼牙村悉其名不進左右固請乃行遇色珍伏四
起中流矢墮馬被擒瘡發不食三日死遂函其首以獻
詔詳袞薩木實傳其首裕悅休格以示諸軍仍以朔州

之捷宣諭南京平州將吏自是宋守雲應諸州者聞繼
業死皆棄城遁八月丁酉置錫林塔拉官六員領裕庫
呼女直德里元等諸部人之隸宮籍者以北大王普努
寧為山後五州都管乙巳韓德讓奏宋兵所掠州郡其
逃民禾稼宜募人收獲以其半給收者從之乙卯色珍
還自軍獻俘已未用室昉韓德讓言復山西今年租賦
詔第山西諸將校功過而賞罰之伊實帳宰相安寧功
過相當追告身一通迪錦部節度使佛努答五十特哩

袞瑤昇伊喇呼喇朔州節度使慎思應州節度使庫濟

雲州節度使華格軍校李元迪蔚州節度使佛哩都監
崔其劉繼珠皆以聞敵逃遁奪官伯瑀仍配隸本貫領
國舅軍旺祿筭五十壬戌以色珍所部將校前破女直
後有宋捷第功加賞癸亥加色珍守太保九月丙寅朔
皇太妃以上納后進衣物馳馬以助會親頒賜甲戌次
黑河以重九登高于高水南阜祭天賜從臣命婦菊花
酒丁丑次河陽北戊寅內外命婦進會親禮物辛巳納

皇后蕭氏丙戌次儒州以大軍將南征詔遣皮室詳袞
持迪郎君伊喇先赴本軍繕甲兵己丑召北大王普努
寧赴行在所甲午皇太后行再生禮冬十月丙申朔党
項準布遣使來貢丁酉皇太后復行再生禮為帝祭神
祈福己亥以伊實王帳郎君烏里為御史大夫政事令
室昉奏山西四川自宋兵後人民轉徙盜賊充斥乞有
司禁止命新州節度使布克達哩選人分道巡檢北大
王帳郎君哈喇噶扎爾言本府王普努寧十七罪詔橫

帳太保和克台鞠之普努寧伏罪十一笞二十釋之哈

喇噶扎爾伏誣告六事命詳酌定之知事勤德連坐杖

一百免官甲辰出居庸關乙巳詔諸京鎮相次軍行諸

細務權停理問庚戌分遣伊哈沿邊偵候辛亥命皇族

盧帳駐東京延芳浚壬子詔以勅勝付裕悅休格以南

征諭拒馬河南六州乙卯幸南京戊午以南院大王留

寧言復南院部民今年租賦壬戌以銀鼠青鼠及諸物

賜京官僧道耆老甲子上與大臣分朋擊鞠十二月丙

寅朔党項來貢庚午以政事令韓德讓守司徒壬申以古北松亭榆關征稅不法致阻商旅遣使鞠之女直請以兵從征許之癸酉御正殿大勞南征將校丙子南伐次狹征堦皇太后親閱輜重兵甲丁丑以休格為先鋒都統戊寅日南至上率從臣祭酒景宗御容辛巳詔以北大王普努寧居奉聖州山西五州公事竝聽與節度使布克達哩共決之癸未祭日月為駙馬都尉勤德祈福乙酉置諸部監勒所部各守營伍毋相錯雜丙戌遣

穆爾古蕭繼遠沿邊巡徼以所獲宋卒射鬼箭丁亥以
青牛白馬祭天地辛卯次白佛塔川獲自落馴狐以為
吉徵祭天地詔駙馬都尉蕭繼遠林牙穆爾古太尉琳
巴等固守封疆毋漏間諜軍中無故不得馳馬及縱諸
軍殘南境桑果壬辰至唐興縣時宋軍屯淳沱橋北選
將亂射之橋不能守進焚其橋癸巳涉沙河休格來議
事北皮室詳袞巴雅爾獻獲宋諜二人上賜衣物令還
招諭泰州卓特部節度使羅卜科都監盼律盼與宋戰

于泰州不利甲午祭廬鹿神以羅卜科臨陣遁逃奪告
身一通其判官都監各杖之郎君伊喇僧庫埒遇宋先
鋒於望都擒其士卒九人獲甲馬十一賜酒及銀器乙
未以羅卜科等罪詔諭諸軍以御蓋郎君華格權卓特
部節度使橫帳郎君佛哩為都監代羅卜科權領國舅
軍托卜威請置二校領散卒詔以郎君舍音佛德充命
彰德軍節度使蕭達林將軍托色畧地東路詔休格巴
雅爾議軍事十二月己亥休格敗宋軍於望都遣人獻

俘壬寅營于滹沱北詔休格以騎兵絕宋兵毋令入邢

州命太師旺祿謹偵候癸卯小校克酬遇宋輜重引兵

殺獲甚衆并焚其芻粟甲辰詔南大王與休格合勢進

討宰相安寧領迪里部及三剋軍殿上率大軍與宋將

劉廷讓李敬源戰于莫州敗之乙巳擒宋將賀令圖楊

重進等國舅詳袞塔爾噶宮使蕭達哩死之丙午詔休

格以下入內殿賜酒勞之丁未築京觀復以南京禁軍

擊揚團城守將以城降詔禁侵掠己酉營神榆村詔上

揚圍城粟麥兵甲之數辛亥以黑白二牡祭天地癸丑
拔馮母鎮大縱俘掠丙辰邢州降丁巳拔深州以不即
降誅守將以下縱兵大掠李繼遷引五百騎款塞願婚
大國永作藩輔詔以王子帳節度使耶律裏之女題木
封義成公主下嫁賜馬三千匹

遼史卷十一

遼史卷十一考證

聖宗紀二統和四年四月遣敬史勤德持詔褒美 按
敬史刻本舊作敬吏今據永樂大典本改正

十二月乙巳擒宋將賀令圖揚重進等國舅詳袞特爾
格宮使蕭達哩死之 按特爾格蕭達哩之死宋通
鑑作壬子日事與此異

遼史卷十一考證

欽定四庫全書蒼要卷六千一百三十七

遼史卷十二

元中書右丞相總裁托克托等修

本紀第十二

聖宗三

五年春正月乙丑破束城縣縱兵大掠丁卯次文安遣
人諭降不聽遂擊破之盡殺其丁壯俘其老幼戊寅上
還南京己卯御元和殿大賚將士壬辰如華林天柱二

月甲午朔至自天柱三月癸亥朔幸長春宮賞花釣魚
以牡丹徧賜近臣歡宴累日丁丑以迪錦部下伊喇嘉
哩偵候有功命入御蓋即君班祇候夏四月癸巳朔幸
南京丁酉上率百僚冊上皇太后尊號曰睿德神略應
運啟化承天皇帝太后禮畢羣臣上皇帝尊號曰至德廣
孝昭聖天輔皇帝戊戌詔有司條上勲舊等第加恩癸
丑清暑冰井六月壬辰召大臣決庶政丙申以耶律蘇
為遙郡刺史秋七月戊辰納喇部節度使薩哈勒有惠

政民請留從之是月獵平地松林九月丙戌幸南京是冬止焉

六年春正月庚申如華林天柱二月丁未奚王籌寧殺無罪人李浩所司議貴請貸其罪令出錢贍浩家從之甲寅大同軍節度使同平章政事劉京致仕己未休格奏宋事宜上親覽之丙寅以司天趙宗德齊泰王守平邵祺閻梅從征四載言天象數有徵賜物有差三月癸未李繼遷遣使來貢夏四月乙未幸南京丁酉呼勒希

橫突韓德讓墮馬皇太后怒殺之戊戌幸宋國王休格
第五月癸亥南府宰相耶律沙薨閏月丙戌朔奉聖州
言太祖所建金鈴閣壞乞加修繕詔以南征恐重勞百
姓待軍還治之壬寅阿爾斯蘭回鶻來貢甲寅威於厥
部以歲貢貂鼠青鼠皮非土產皆於他處貿易以獻乞
改貢詔自今止進牛馬六月癸亥黨項太保鄂勒歡來
朝貢方物乙丑諭諸道兵馬備南征攻城器具癸酉額
爾奇木鄂勒博送沙州節度使曹恭順還授裕悅秋七

月丙戌觀市巳亥遣南面招討使韓德威討河湟番違
命者賜休格巴雅爾部諸軍戰馬巳酉駐蹕潞河壬子
加韓德威開府儀同三司兼政事令門下平章事東京
留守兼侍中漆水郡王耶律穆濟為大同軍節度使癸
丑巴雅爾請置涿州驛傳八月丙辰以青牛白馬祭天
地戊午休格巴雅爾紐勒琿捉生將至易州遇宋兵殺
其指揮使而還庚申幸黎園溫湯癸亥以將伐宋遣使
祭木葉山丁丑瀕海女直遣使薩喇勒來朝西北路管

押詳袞舒僧格以伐哲琳珠嚕二部上所俘獲東路林
牙蕭勤德及統軍實埒以擊敗女直兵獻俘大同軍節
度使耶律穆濟奏今歲霜早乏食乞增價折粟以利貧
民詔從之濱海女直遣薩喇勒來修土貢丙申華格與
珠巴克崇古嚕來貢休格遣詳袞音德爾獻所獲宋謀
者丁酉皇太后幸韓德讓帳厚加賞賚命從臣分朋雙
陸以盡歡九月戊戌幸南京己亥有事于太宗皇帝廟
以唐元德為奉陵軍節度使癸卯祭旗鼓南伐庚戌次

涿州射帛書諭城中降不聽乙卯縱兵四面攻之城破
乃降因撫諭其衆駙馬蕭勤德太師達林皆中流矢勤
德載帝車中以歸聞宋軍退遣色珍巴雅爾追擊大敗
之冬十月戊午攻沙堆驛破之己巳以黑白羊祭天地
庚午以宋降軍分置七指揮號歸聖軍壬申行軍叅謀
宣政殿學士馬得臣言諭降宋軍恐終不為用請茲放
還詔不允丙子籌寧奏破狼山捷辛巳復奏敗宋兵于
益津闕癸未進軍長城口宋定州守將李興以兵來拒

休格擊敗之追奔五六里十一月甲申上以將攻長城
口詔諸軍備攻具庚寅駐長城口督大軍四面進攻士
潰圍委城遁色珍招之不降上與韓德讓邀擊之殺獲
殆盡獲者分隸燕軍辛卯攻滿城圍之甲午拔其城軍
士開北門遁上使諭其將領乃率衆降戊戌攻下祁州
縱兵大掠己亥拔新樂庚子破小狼山砦丁未宋軍千
人出益津闕國舅郎君托卜威詳袞實格擊走之殺一
副將己酉休格獻黃皮室詳袞狗地莫州所獲馬二十

匹士卒二十人命賜降者衣帶使隸燕京辛亥西路又
送降卒二百餘人給寒者裘衣以馬得臣權宣徽院事
十二月甲寅朔賜皮室詳袞持迪圖古勒戰馬橫帳郎
君達達哩刼掠命杖之丙辰敗于沙河休格獻奚詳袞
葉嚕所獲宋謀丁巳遣北宰相蕭繼遠等往覘安平侍
衛馬軍司奏攻祁州新樂都頭劉贊等三十人有功乞
加恩賞是月大軍駐宋境是歲詔開貢舉一人及第
七年春正月癸未朔班師戊子宋雞壁砦守將郭榮率

衆來降詔屯南京庚寅次長城口三卒出營劫掠笞以
徇衆以所獲物分賜左右壬辰李繼遷與兄繼捧有怨
乞與通好上知其非誠不許癸巳諭諸軍趣易州己亥
禁部從戍民桑梓癸卯攻易州宋兵出遂城來援遣鐵
林軍擊之擒其指揮使五人甲辰大軍齊進破易州降
刺史劉墀守裨士卒南遁上帥師邀之無敢出者即以
馬質為刺史趙質為兵馬都監遷易州軍民于燕京以
東京騎將夏貞顯之子僂壽先登授高州刺史乙巳辛

易州御五花樓撫諭士庶丙午以青牛白馬祭天地詔
諭三京諸道戊申次漆水謁景宗皇帝廟詔遣涿州刺
史耶律守雄護送易州降人八百還隸本貫己酉次岐
溝射鬼箭辛亥還次南京六軍解嚴二月壬子朔上御
元和殿受百官賀詔雞壁若民二百戶徙居檀順薊三
州甲寅向鵠于闐師子等國來貢乙卯大饗軍士爵賞
有差樞密使韓德讓封楚國王駙馬都尉蕭寧遠同政
事門下平章事是日幸長春宮甲子詔南征所俘有親

屬分隸諸帳者給官錢贖之使相從乙丑賞南征女直

軍使東還丙寅禁舉人匿名飛書謗訛朝廷癸酉吐蕃

黨項來貢甲戌雲州租賦請止輸本道從之丙子以女

直和克岱為本部相分遣巫覡祭名山大川丁丑皇子

佛寶努生戊寅阿爾斯蘭于闐轄哩遣使來貢三月壬

午朔遣使祭木葉山禁芻牧傷禾稼宋進士十七人挈

家來歸命有司考其中第者補國學官餘授縣主簿尉

李繼遷遣使來貢丁亥詔知易州趙質收戰亡士卒骸

骨築京觀戊子賜裕悅宋國王紅珠筋線命入內神帳
行再生禮皇太后賜物甚厚以雞壁砦民成廷朗等八
戶隸飛狐己丑詔免雲州逋賦伊實王固寧擊鞠為所
部郎君高四縱馬突死詔訊高四罪丙申詔開奇峰路
通易州市戊戌以王子帳耶律襄女封義成公主下嫁
李繼遷是春駐蹕延芳淀夏四月甲寅還京乙卯國舅
太師蕭達林為子巴雅爾請尚皇女延壽公主許之丙
辰謁太宗皇帝廟御史大夫烏爾古領伊實大王己未

幸延壽寺飯僧甲子諫議大夫馬得臣以上好擊毬上
疏切諫云臣伏見陛下聽朝之暇以擊毬為樂臣思此
事有三不宜上下分朋君臣爭勝君得臣奪君輸臣喜
一不宜也往來交錯前後遮約爭心競起禮容全廢若
貪月杖誤拂天衣臣既失儀君又難責二不宜也輕萬
乘之貴逐廣場之娛地雖平至為堅确馬雖良亦有驚
厥或因奔擊失其控御聖體寧無虧損太后豈不驚懼
三不宜也臣望陛下念繼承之重止危險之戲疏奏大

嘉納之丁卯吐渾和珍回鶻安進吐蕃都圖等自宋來
歸皆賜衣帶皇太后謁于竒善汗廟丙子以錫里軍耶
律杳為常衮已卯駐蹕儒州龍泉庚辰遣宣徽使布琳
等率兵分道備宋以約尼副使崆郭囉為錫里伊喇詳
衮五月辛巳祭風伯于儒州白馬村休格引軍至滿城
招降卒七百餘人遣使來獻詔隸東京辛卯獵桑乾河
壬辰燕京奏宋兵至邊時暑未敢與戰且駐易州俟彼
動則進擊退則班師從之六月庚戌朔以太師札木迎

合過之二十辛酉詔燕樂密雲二縣荒地許民耕種免
賦役十年甲戌宣政殿學士馬得臣卒詔贈太子少保
賜錢十萬粟百石乙亥出諸畜賜邊部貧民是月休格
巴雅爾破宋兵于泰州秋七月乙酉御含涼殿視朝丙
戌以中丞耶律哈密哈權伊勒希巴橫帳郎君耶律延
壽為御史大夫癸巳遣兵南征甲午以德勒賓納喇威
三部各四人益東北路來人布爾德仍給印綬丁酉勞
南征將士是日帝與皇太后謁景宗皇帝廟八月庚午

放進士高正等二人及第冬十月禁置網捕兔十一月
甲申于闐張文寶進內丹書十二月甲寅釣魚于沈子
灤癸亥獵于好草嶺

遼史卷十二

遼史卷十二考證

聖宗紀三統和五年八月丙辰以青牛白馬祭天地
按朔考是年八月係乙卯朔丙辰乃八月初二日也
本紀原文誤入七月謹據朔考改

六年是歲詔開貢舉一人及第 按永樂大典本書放
高舉一人及第攷本紀是年以後俱書放某等幾人
及第則此處當係脫文謹附考

七年十二月甲寅釣魚于沈子灤 按十二月原本作

十一月攷上文已書十一月今據永樂大典本改正

遼史卷十二考證



總校官原候補知府臣葉佩蓀

校對官編修臣吳錫麒

騰錄監生臣孫樹新

欽定四庫全書叢要

史部
遼史卷十三至
七

詳校官祭酒臣韋謙恒



欽定四庫全書薈要卷六千一百三十八

遼史卷十三

元中書右丞相總裁托克托等修

紀第十三

聖宗四

八年春正月辛巳如臺湖庚寅詔決滯獄庚子如沈子
深二月丁未朔于闐回鶻各遣使來貢壬申女直遣使
來貢三月丁丑李繼遷遣使來貢庚辰太白熒惑鬪凡

十有五次乙酉城杏堦以宋俘寔之辛丑置宜州夏四月丙午朔嚴州刺史李壽英有惠政民請留從之庚戌女直遣使來貢庚午以歲旱諸部艱食振之五月戊子以宋降卒分隸諸軍庚寅女直宰相阿海來貢封順化王丙申清暑呼圖哩巴山詔括民田六月丙午北面林牙穆爾古為北院大王阿爾斯蘭回鶻裕悅達爾罕遣使來貢甲寅月掩天駟第一星丙辰女直遣使來貢秋七月庚辰改南京熊軍為神軍詔東京路諸宮分提轄

司分置定霸保和宣化三縣白川州置洪理儀坤州置
廣義遼西州置長慶乾州置安德各一縣省遂嫺松饒
寧海瑞玉特里奉德等十州及玉田遼豐松山弘遠懷
清雲龍平澤平山等八縣以其民分隸他郡八月乙卯
以黑白羊祭天地九月乙亥北女直四部請內附壬辰
察貪酷撫高年禁奢僭有歿於王事者官其子孫己未
夏國以復綏銀二州遣使來告八月癸酉銅州嘉禾生
東京甘露降戊寅女直進喚鹿人壬午東京進三足鳥

九月庚子布古德來貢己酉駐蹕廟城南京地震冬十月丁卯阿爾斯蘭回鶻來貢壬申夏國王李繼遷遣使上宋所授勅命丁丑定難軍節度使李繼捧來附授推忠效順啟聖定難功臣開府儀同三司檢校太師兼侍中封西平王十一月己亥以青牛白馬祭天地十二月夏國王李繼遷潛附于宋遣招討使韓德威持詔諭之是歲放進士石用中一人及第

十年春正月丁酉禁喪葬禮殺馬及藏甲冑金銀器玩

丙午如臺湖二月乙丑朔日有食之韓德威奏李繼遷
稱故不出至靈州俘掠以還壬申烏色來貢壬午免雲
州祖賦庚寅夏國以韓德威俘掠遣使來奏賜詔安慰
辛卯給復雲州流民三月甲辰鐵驪來貢丙辰如炭山
夏四月乙丑以臺湖為望辛里庚寅命羣臣較射五月
癸巳朔州流民給復三年七月辛酉鐵驪來貢八月癸
亥觀稼仍遣使分閱苗稼九月癸卯辛五臺山金河寺
飯僧冬十月壬申夏國王遣使來貢戊寅鐵驪來貢十

一月壬辰回鶻來貢十二月庚辰獵儒州東川拜天是月以東京留守蕭恒德等伐高麗

十一年春三月壬寅回鶻來貢丙午出內帑錢賜南京統軍司軍高麗王治遣朴良柔奉表請罪詔取女直鴨綠江東數百里地賜之二月癸亥霸州民妻王氏以妖惑衆伏誅夏四月辛未山清暑六月大雨秋七月己丑柔乾羊河溢居庸關西害禾稼殆盡奉聖南京居民廬舍多墊溺者八月如秋山冬十月甲申朔駐蹕富瑚坂

是歲放進士王熙載等二人及第

十二年春正月癸丑朔鄆陰鎮水漂溺三十餘村詔疏
舊渠甲寅同政事門下平章事耶律寔埒為特哩袞詔
復行在五十里內祖乙卯辛延芳浚戊午蠲宜州賦調
庚申郎君耶律必舒等謀叛伏誅壬戌以南院大王耶
律景為上京留守封漆水郡王霸州民李在宥年百三
十有三賜束帛錦袍銀帶月給羊酒仍復其家二月甲
申免南京被水戶租賦己丑高麗來貢甲午免諸部歲

輸羊及關征庚子回鶻來貢三月丁巳高麗遣使請所
俘人畜詔贖還戊午幸南京丙寅遣使撫諭高麗己巳
涿州木連理壬申如長春宮觀牡丹是月復置南京統
軍都監夏四月辛卯幸南京壬辰樞密直學士劉恕為
南院樞密副使戊戌以景宗石像成幸延壽寺飯僧五
月甲寅詔北皮室軍老不任事者免役戊午如炭山清
暑庚辰武定軍節度使韓德冲秩滿其民請留從之六
月辛巳朔詔州縣長吏有才能無過者減一資考任之

癸未汗州刺史賈俊進呈新曆庚子錄囚甲辰詔寵鳳

兩軍老疾者代之是月太白歲星相犯秋七月辛亥朔

日有食之甲寅遣使視諸道禾稼辛酉南院樞密使室

昉為中京留守加尚父丙寅女直遣使來貢戊辰觀獲

庚午詔契丹人犯十惡者依漢律已郊以翰林承旨邢

抱朴參知政事八月庚辰朔詔皇太妃領西北路烏爾古

等部兵及永興宮分軍撫定西邊以蕭達林督其軍事乙

酉宋遣使求和不許戊子以國舅帳尅蕭圖格為伊勒

希巴乙未下詔戒諭中外官吏丁酉錄囚雜犯死罪以下釋之九月壬子室韋党項吐谷渾等來貢辛酉宋復遣使求和不許壬戌行拜奠禮癸酉準布等來貢冬十月乙酉獵于汗州之西山乙巳詔定均稅法丁未大理寺置少卿及正十一月戊申朔行再生禮鐵驪來貢詔諸部所俘宋人有官吏儒生抱器能者諸道軍有勇健者具以名聞庚戌詔郡邑貢明經茂材異等甲寅詔南京決滯獄己未官宋俘衛德升等六人十二月戊寅朔

日有食之詔并奚王府散拉托輝瑪展三部為一其二
尅各分為部以足六部之數甲申賜南京統軍司貧戶
耕牛戊子高麗進妓樂却之庚寅禁游食民癸巳女直
以宋人浮海賂本國及烏色叛來告丁未幸南京是年
放進士呂德懋等二人及第

十三年春正月壬子幸延芳淀甲寅置廣靈縣丁巳增
泰州遂城等縣賦庚申詔諸道勸農癸亥長寧軍節度
使蕭嘉哩秩滿民請留從之庚午如長春宮二月丁丑

女直遣使來貢甲辰高麗遣李周禎來貢三月癸丑夏
國遣使來貢戊辰武清縣百餘人入宋境剽掠命誅之
還其所獲人畜財物夏四月己卯參知政事邢抱朴以
母憂去官起復丙戌詔諸道民戶應歷以來脅從為部
曲者仍籍州縣甲午如炭山清暑五月壬子高麗進鷹
乙亥北南伊實三府請括富民馬以備軍需不許給以
官馬六月丙子朔啟聖軍節度使劉繼琛秩滿民請留
從之丁丑詔減前歲括田租賦甲申以宣徽使阿穆爾

私城為豐州丙戌詔許昌平懷柔等縣諸人請業荒地

秋七月乙巳朔女直遣使來貢丁巳烏色烏哲圖渤海

燕頗等侵鐵驪遣奚王和碩烏等討之壬戌詔蔚朔等

州龍衛威勝軍更戌八月丙子夏國遣使進馬壬辰詔

修山澤祠宇先哲廟貌以時祀之九月戊午以南京太

學生員浸多特賜水磴莊一區丁卯奉安景宗及皇太

后石像于延芳淀冬十月乙亥置義倉辛巳回鶻來貢

甲申高麗遣李知白來貢戊子烏色歸款詔諭之庚子

布古德來貢十一月乙巳阿爾斯蘭回鶻使來貢辛酉
遣使冊王治為高麗國王戊辰高麗遣童子十人來學
本國語十二月己卯鐵驪遣使來貢鷹馬辛巳夏國以
敗宋人遣使來告是年放進士王用極等二人

十四年春正月己酉漁于潞河丁巳蠲三京及諸州稅
賦丙寅夏國遣使來貢庚午以宣徽使阿穆爾家奴闖
貴為豐州刺史二月庚寅回鶻遣使來貢三月壬寅高
麗王治表乞為婚許以東京留守駙馬蕭恒德女嫁之

庚戌高麗復遣童子十人來學本國語甲寅韓德威奏
討党項捷甲子詔安集朔州流民夏四月甲戌東邊諸
紂各置都監庚寅如炭山清暑己亥鑿大安山取劍守
光所藏錢是月奚王和碩魯東京留守蕭恒德等五人
以討烏色不克削官改諸部令公為節度使五月癸卯
詔參知政事邢抱朴決南京滯獄庚戌朔州威勝軍一
百七人叛入宋六月辛未如炭山清暑鐵驪來貢乙酉
回鶻來貢己丑高麗遣使來問起居後至無時秋七月

戊午回鶻等來貢閏月丁丑五院部進穴地所得金馬
冬十月丙辰命劉遂教南京神武軍士劍法賜袍帶錦
幣戊午烏哲圖乞內附十一月甲戌詔諸軍官毋非時
畋獵妨農乙酉奉安景宗及太后石像于乾州是月回
鶻阿爾斯蘭請為子求婚不許十二月甲寅以南京道
新定稅法太重減之甲子連林誘叛酋阿勒坦等六十
人斬之封蘭陵郡王幸南京是年放進士張儉等三人
十五年春正月庚午幸延芳淀丙子以河西党項叛詔

韓德威討之庚辰詔諸道勸民種樹癸未烏色長武周

來降戊子女直遣使來貢己丑詔南京決滯囚乙未免

流民稅二月丙申朔如長春宮戊戌勸品部富民出錢

以贍貧民庚子徙梁門遂城泰州北平民於內地丙午

夏國遣使來貢甲寅問安皇太后丙辰韓德威奏破党

項捷丁巳詔品部曠地令民耕種三月乙丑朔党項來

貢戊辰募民耕灤州荒地免其租賦十年己巳夏國破

宋兵遣使來告己卯封夏國王李繼遷為西平王壬午

通括宮分人戶免南京逋稅及義倉粟甲申河西党項
乞內附庚寅烏色烏哲圖以地遠乞歲時免進鷹馬貂
皮詔以生辰正旦貢如舊餘免癸巳宋主炅殂子恒嗣
位甲午皇太妃獻西邊捷夏四月乙未朔罷奚王部歲
貢庚戌錄囚壬寅發義倉粟賑南京諸縣民丙午廣
德軍節度使韓德凝有善政秩滿其民請留從之己酉
幸南京丁巳致奠于太宗皇帝廟己未如炭山清暑五
月甲子日有食之己巳詔平州決滯獄是月德呼勒八

部殺詳袞以叛蕭達林追擊獲部族之半六月丙申鐵
驪來貢壬子夏國遣使來謝封冊秋七月戊辰党項來
貢辛未禁吐谷渾別部鬻馬於宋丙子高麗遣韓彥敬
奉幣弔越國公主之喪辛卯詔南京疾決獄訟八月丁
酉獵于平地松林皇太后誡曰前聖有言欲不可縱吾
兒為天下主馳騁田獵萬一有銜橛之變適遣予憂其
深戒之九月丙寅罷東邊戍卒庚午幸饒州致奠太祖
廟戊子蕭達林奏討準布捷冬十月壬辰朔駐蹕馳山

罷奚王諸部貢物乙未賜宿衛時服丁酉禁諸山寺毋
濫度僧尼戊戌弛東京道魚灤之禁戊申以上京獄訟
繁冗詰其主者辛酉錄囚十一月壬戌朔錄囚丙戌辛
顯州戊子謁顯陵庚寅謁乾陵是月高麗王治薨姪誦
遣王同穎來告十二月乙巳釣魚土河己酉駐蹕馳山
壬子夏國遣使來貢甲寅遣使祭高麗王治詔其姪權
知國事丙辰錄囚是年放進士陳鼎等二人

遼史卷十三

欽定四庫全書薈要卷六千一百三十九

遼史卷十四

元 中書右丞相總裁托克托等修

本紀第十四

聖宗五

十六年春正月乙丑如長樂二月庚子夏國遣使來貢
丙午以監門衛上將軍耶律錫呼為中臺省左相三月
甲子女直遣使來貢乙亥布古德酋長來貢夏四月癸

卯振崇德宮所隸州縣民之被水者丁未罷民輸官俸

給自內帑己酉祈雨乙卯如木葉山五月甲子祭白馬

神丁卯祠木葉山告來歲南伐庚辰鐵驪來貢乙酉還

上京婦人年踰九十者賜物六月戊子朔致奠於祖懷

二陵是月清暑炭山秋七月丁巳朔錄囚聽政八月丁

亥朔東幸九月丁巳朔駐蹕得勝口冬十一月遣使冊

高麗國王誦十二月丙戌宋國王休格薨輟朝五日進

封皇弟恒王隆慶為梁國王南京留守鄭王隆祐為吳

國王是年放進士楊文立等二人

十七年春正月乙卯朔如長春宮夏四月如炭山清暑
六月烏色烏哲圖來秋七月以伐宋詔諭諸道九月庚
辰朔幸南京己亥南伐癸卯射鬼箭北院樞密使魏王
耶律色珍薨以韓德讓兼知北院樞密使事冬十月癸
酉攻遂城不克遣蕭繼遠攻狼山鎮石砦破之次瀛州
與宋軍戰擒其將康昭裔宋順獲兵仗器甲無算進攻
樂壽縣拔之次遂城敵衆臨水以拒縱騎兵突之殺戮

殆盡是年放進士初錫等四人及第

十八年春正月還次南京賞有功將士罰不用命者詔諸軍各還本道二月辛延芳浞夏四月己未駐蹕於清泉浞五月丁酉清暑炭山六月準布叛首呼紐之弟特徹布率部衆來附呼紐無所歸遂降詔誅之秋七月駐蹕於湯泉九月乙亥朔駐蹕黑河冬十一月甲戌朔授西平王李繼遷子德昭朔方軍節度使十二月回鶻來貢是年放進士南承保等三人及第

十九年春正月辛巳以祇候郎君班詳袞觀音為溪六
部大王甲申回鶻進梵僧名醫三月乙亥夏國遣李文
貴來貢乙酉西南面招討司奏党項捷壬辰皇后蕭氏
以罪降為貴妃賜大丞相韓德讓名德昌夏四月乙巳
幸吳國王隆祐第視疾丙午問安皇太后五月癸酉清
暑炭山丙戌冊蕭氏為齊天皇后庚寅以十伊喇詳袞
耶律仁努為伊實大王辛卯以青牛白馬祭天地六月
乙巳以所俘宋將康昭裔為昭順軍節度使戊午夏國

奏下宋恒懷慶等三州賜詔褒之秋七月丙戌以東京

統軍使耶律諾觀為南府宰相八月庚戌達囉克部來

貢九月己巳朔問安皇太后戊子駐蹕昌平庚寅西南

面招討司奏討吐谷渾捷辛卯幸南京冬十月己亥南

伐壬寅次鹽溝徙封吳國王隆祐為楚國王留守京師

丁未梁國王隆慶統先鋒軍以進辛亥射鬼箭壬子以

青牛白馬祭天地甲寅遼軍與宋兵戰于遂城敗之庚

申以黑白羊祭天地丙寅次蒲城以泥淖班師十一月

庚午射鬼箭丙子宋兵出淤口益津關來侵偵候瑪與
虞人珠克擊敗之己卯觀漁儒門樂閏月己酉鼻骨德
來貢己未減關市稅十二月庚辰免南京平州租稅

二十年春正月庚子如延芳淀癸丑東方五色虹見詔
安撫西南面向化諸部甲寅夏國遣使貢馬馳辛酉女
直宰相伊爾岱來貢二月丁丑女直遣其子來朝高麗
遣使賀伐宋捷三月甲寅遣北府宰相蕭繼遠等南伐
壬戌駐蹕鴛鴦濼夏四月丙寅朔文班太保達里塔敗

宋兵於梁門甲戌南京統軍使蕭達林破宋軍於泰州

乙酉南征將校獻俘賜爵賞有差戊子鐵驪遣使來貢

五月乙卯幸炭山清暑六月夏國遣劉仁昂來告下靈

州秋七月甲午朔日有食之丁酉以邢抱朴為南院樞

密使辛丑高麗遣使來貢本國地里圖九月癸巳朔謁

顯陵告南伐捷冬十月癸亥朔至自顯陵十二月奚王

府五帳六節度獻七金山土河川地賜金幣是歲南京

平州麥秀兩岐放進士邢祥等六人及第

二十一年春正月如鴛鴦灤三月壬辰詔修日歷官毋
書細事甲午朝皇太后戊午鐵驪來貢夏四月乙丑女
直遣使來貢戊辰烏色渤海鄂羅木伊埒圖伊呼等
五部遣使來貢是月耶律諾觀蕭達林獲宋將王繼忠
于望都五月庚寅朔清暑炭山丁巳西平王李繼遷薨
其子德昭遣使來告六月己卯贈繼遷尚書令遣西上
閣門使丁振弔慰辛巳黨項來貢乙酉準布特爾里克
率諸部來降修哈屯城秋七月庚戌準布烏爾古來貢

甲寅奚王府監軍耶律舒嚕為南院大王八月乙酉準
布特爾里克來朝丙戌朝皇太后九月己亥夏國李德
昭遣使來謝弔贈癸丑幸女河湯泉改其名曰松林冬
十月丁巳駐蹕七渡河戊辰以楚國王隆祐為西南面
招討使十一月壬辰故裕悅耶律休格之子道士努高
九等謀叛伏誅丙申通括南院部民十二月癸未罷三
京諸道貢

二十二年春正月丁亥如駕鶩樂二月乙卯朔女直遣

使來貢兩寅南院樞密使邢抱朴薨輟朝三日三月己丑罷番部賀千齡節及冬至重五貢乙未西夏李德昭遣使上繼遺物夏四月丁卯朝皇太后五月清暑炭山六月戊子以哈屯城為鎮州軍曰建安秋七月甲申遣使封夏國李德昭為西平王丁亥烏色富珠哩博和哩伊埒圖鄂羅木等部來貢八月丙辰黨項來貢庚申準布特爾里克來朝戊辰特爾里克求婚不許丙子駐蹕犬牙山九月己丑以南伐諭高麗丙午幸南京女直遣

使獻所獲烏哲圖妻子丁未致祭于太宗皇帝廟以北
院大王穆爾古太尉老君努監北南王府兵庚戌命楚
國王隆祐留守京師閏月己未南伐癸亥次固安以所
獲謀者射鬼箭甲子以青牛白馬祭天地丙寅遼師與
宋兵戰于唐興大破之丁卯蕭達林與宋軍戰于遂城
敗之庚午軍于望都冬十月乙酉以黑白羊祭天地丙
戌攻瀛州不克甲午下祁州賚降兵以酒脯祭天地己
酉西平王李德昭遣使謝封冊十一月癸亥軍馬都指

揮使耶律科里遇宋兵于洛州擊退之甲子東京留守
蕭巴雅爾獲宋魏府官田逢吉郭守榮常顯劉緯等以
獻丁卯南院大王善補奏宋遣人遺王繼忠弓矢密請
求和詔繼忠與使會許和庚午攻破德清軍壬申次澶
淵蕭達林中伏弩死乙亥攻破通利軍丁丑宋遣崇儀
副使曹利用請和即遣飛龍使韓杞持書報聘十二月
庚辰朔日有食之既癸未宋復遣曹利用來以無還地
之意遣監門衛大將軍姚東之持書往報戊子宋遣李

繼昌請和以太后為叔母願歲輸銀十萬兩絹二十萬匹許之即遣閤門使丁振持書報聘己丑詔諸軍解嚴是月班師皇太后賜大丞相齊王韓德昌姓耶律從王晉是年放進士李可封等三人

二十三年春正月戊午還次南京庚申大饗將卒爵賞有差二月丙戌復置權場於振武軍丁巳夏國遣使告下宋青城辛酉朝皇太后以特哩袞華格為南院大王行軍都監老君努為特哩袞振黨項部丁卯回鶻來貢

丁丑改易州飛狐招安使為安撫使夏四月丙戌女直
及阿爾斯蘭回鶻遣使來貢乙未鐵驪來貢己亥黨項
來侵五月戊申朔宋遣孫僅等來賀皇太后生辰乙卯
以金帛賜陣亡將士家丙寅高麗以與宋和遣使來賀
六月壬辰清暑炭山甲午準布特爾里克遣使賀與宋
和己亥達旦國九部遣使來聘秋七月癸丑問安皇太
后戊午黨項來貢辛酉以青牛白馬祭天地壬戌烏古
來貢丁卯女直遣使來貢阿爾斯蘭回鶻遣使來請先

留使者遣之九月甲戌遣太尉阿里太傅揚魯賀宋王
生辰冬十月丙子朔布古德來貢戊子朝皇太后甲午
駐蹕七渡河癸卯宋歲幣始至後為常十一月戊申上
遣太保和卓頒給使韓簡太后遣太師博諾政事舍人
高正使宋賀正旦辛亥觀漁桑乾河丁巳詔大丞相耶
律德昌出宮籍屬於橫帳十二月丙申宋遣周漸等來
賀千齡節丁酉復遣張若谷等來賀正旦

二十四年春正月如鴛鴦灤夏五月壬寅朔幸炭山清

暑幽皇太妃呼紐于懷州囚夫人伊蘭于南京餘黨皆

生瘞之秋七月辛丑朔南幸八月丙申改南京宮宣教

門為元和外三門為南端左掖門為萬春右掖門為千

秋是月沙州燉煌王曹壽遣使進大食國馬及美玉以

對衣銀器等物賜之九月幸南京冬十月庚午朔帝率

羣臣上皇太后尊號曰睿德神畧應運啓化承天皇太

后羣臣上皇帝尊號曰至德廣孝昭聖天輔皇帝大赦

是年放進士楊佖等二十二人及第

二十五年春正月建中京二月如鴛鴦灤夏四月清暑
炭山六月賜皇太妃呼紐死于幽所秋七月壬申西平
王李德昭母薨遣使弔祭甲戌遣使起復九月西北路
招討使蕭托雲討準布破之冬十月丙申駐蹕中京十
二月己酉振饒州饑民

二十六年春二月如長灤夏四月辛卯朔祠木葉山五
月庚申朔還上京丙寅高麗進龍鬚草席己巳遣使賀
中京成庚午致祭祖懷二陵辛未駐蹕懷州秋七月增

太祖太宗讓國皇帝世宗諡仍諡皇太弟魯呼曰欽順
皇帝冬十月戊子朔幸中京十二月蕭托雲奏討甘州
回鶻降其王伊囉勒撫慰而還是年放進士史克忠等
一十三人

二十七年春正月釣魚土河獵于瑞鹿原夏四月丙戌
朔駐蹕中京營建宮室庚戌廢霸州處置司秋七月甲
寅朔霖雨潢土幹拉陰涼四河皆溢漂沒民舍八月甲
申北幸冬十一月壬子朔行柴冊禮十二月乙酉南幸

皇太后不豫戊子肆赦辛卯皇太后崩于行宮壬辰遣使報哀于宋夏高麗戊申如中京己酉詔免賀千齡節是歲御前引試劉二宜等三人

遼史卷十四

遼史卷十四考證

聖宗紀五統和十七年秋七月伐宋冬十月癸酉攻遼
城不克次瀛州與宋軍戰擒其將康昭裔宋順 按
康昭裔通鑑作康保裔據通鑑則保裔乃戰死真宗
優詔贈恤錄其子孫據遼史則昭裔已就擒後且以
為昭順軍節度使二者未知孰是

十八年春正月還次南京 按續通鑑契丹知帝親征
縱掠而去則聖宗之還次南京因宋真宗之親征而

遼史諱之也

二十二年閏九月丙寅遼師與宋兵戰于唐興 按續
通鑑唐興作唐河

二十三年十二月丙申宋遣周漸等來賀千齡節丁酉
復遣張若谷等賀正旦 按周漸之使宋史不載而
正旦所遣乃韓國華也此云張若谷與宋史異

遼史卷十四考證